



Suliassani meeqqanut inuusuttunullu tunngasuni sulianik ingerlatsisarnerup pitsaanerulernissaa qularnaarniarlugu angajoqqaatut oqartussaassuseqartunik, angajoqqaatut oqartussaataasunik akuersissuteqarnermillu nalunaarutininik qitiusumik nalunaarsuiffimmik isumannaatsumik pilersitsinissamat suut aporfiunersut pillugit UPA2025 nallertinnagu nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarsuiviup pilersinneqarnerata ingerlanneqarneratalu qanoq akeqarnissaannut naatsorsuinernik nassuiaat imaqqassaaq.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Meeqqat immikkut pisariaqartitsisut piaarnerusumik kinaassusersillugillu misissorneqartarnissaat qularnaarniarlugu perorsaannikkut tarnikkullu siunnersuisarneq (Misi/PPR) eqqarsaatigalugu kommunit suleqatigalugit nunamut tamarmut najoqqutassianik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Kommunini inunnik isumaginninnikkut sagsbehandlerit ikippallaarneri, suliassallu amerlavallaarnerisa aaqiivigineqarnissaat pillugu Naalakkersuisut nalunaarusioqqullugit Inatsisartut aalajangiiffigisassaattut siunnersuut. Nalunaarusiaq UPA2025-mi agguanneqassaaq.

(Inatsisartunut ilaasortaq Bentiaaraq Ottosen, Atassut)

(Siullermeerneqarnera)

Qujanaq siunnersuuteqartunut.

Aallaqqaasiutigerusuppara Inatsisartunut Ilaasortap Anna Wangenheim-ip siunnersuutaanut pitsaasunut tamakkiisumik taperserakku. Anna Wangenheim-p taakkuninnga siunnersuuteqarnermini aammaarluni ajornartorsiutinut, inuiaqatigiit ajornartorsiutigisaannut paasinninnini takuteqqippaa – pingaartumik meeqqat inuusuttullu illersorneqarnerannut tunngatillugu.

Anna Wangenheim-ip siunnersuutaa angajoqqaatut oqartussaataasut akisussaataasullu qitiusumik nalunaarsuiffimmik isumannaatsumik pilersitsinissamik siunnersuut nutaaliornerrullunilu pisariaqartuuvoq. Nalunaarsuinerup taamaattup pilersinneratigut sulineq eqaannerujussuannngussaaq, meeqqat inuusuttullu – pingaartumik atugarliornerpaat – sullinnerisigut sukkasuumik pisariaqartitaannik ikiorsernissaannut. Suliniutip taassuma sulinerup eqaallisarnissaa pitsanngorsaannarnagu isumaginninnikkut ingerlatsinitta naapertuilluarnerulerneranik kinguneqartussaavoq ammasuunissaanillu. Tamanna siumut alloriarnermut pingaaruteqarpoq, uagut Demokraatiniit 100 procentimik Anna Wangenheim-imit isumassarsiaq tapersorsorlutigu.



Taamatutaaq tamakkiisumik taperserpara perorsaanikkut tarnikkullu siunnersuisarneq (misi/PPR) eqqarsaatigalugu nunamut tamarmut najoqqutassianik pilersitsinissamik Anna Wangenheim-ip siunnersuutaa). Taakkuninnga najoqqutassiaqalernermi qulakkeerneqassaaq, meeqqat immikkut pisariaqartitsisut taperserneqarnissaq sukkasuumik aalajangersimasumillu sumiluunniit kommunimi najugaqaralarunik. Anna Wangenheim-ip Misi/PPR najoqqutassiamik pilersitsinissamik siunnersuutaa annertunerusumik assigiisitsinermik ataqatigiinnermillu aaqqissuussaansinnut alloriaataavoq. Siumut isigisumik isumassarsiaavoq, qulakkeerinittusaaq, meeqqat inuunerissaarnissaannut ineriartornerannullu qitiutitsisusaaq tassungalu ilutigalugu atuariup, peqqinnissaqarfiup aamma MiSi/PPR akornanni pitsaanerusumik suleqatigiinnermik pilersitsisusaaq. Assorsuaq isumassarsinarpoq takullugu, Anna Wangenheim ataatsimut isiginnittumik eqqarsarmat unamminartullu piviusut taakkartormagit meerartatsinnut taakkulu ilaqutaannut allannguinnissamik kinguneqarsinnaasut.

Naggataatigut naatsumik Atassummit siunnersuummut tapersiinera eqqaalaarusuppara kommunit isumaginninnikkut immikkoortortaqarfiini sullissisut amerlinissaanut pisariaqartitsinermut tunngasumut. Ajornartorsiutaavoq pingaaruteqarluinnartoq, sullissisup suliffianut ilaqutariinnullu, tapersersorneqarnissaminnik pisariaqartitsisunut pingaaruteqarluinnartoq. Taamaattumik nalunaarusiornissamik siunnersuut taperserparput, siunissami sulisunut innuttaasunullu pissutsinik pitsaanerusunik pilersitseqataasussaammat.

Taamatut oqaaseqaateqarluta siunnersuutit pingasut tamarmik Ilaqutariinnut- aamma Peqqissutsimut ataatsimiititaliami suliareqqitassanngorlugit innersuunneqarput.